

Emnas da barat concernent las linguas chantunalas

Basa legala

La lescha da linguas dal chantun Grischun è vegnida messa en vigur per il 1. da schaner 2008. Quai ha concludì la regenza grischuna. Il medem mument ha ella relaschè in'ordinaziun da linguas. Quella concretisescha diversas disposiziuns da la lescha da linguas ed è er entrada en vigur il cumenzament da l'onn 2008.

Art. 17

¹ Ils posts da servetsch cumpetents dal departament d'educaziun, cultura e protecziun da l'ambient promovon sin tut ils stgalims da scola programs da barat tranter las cuminanzas linguisticas chantunalas per classas da scola e per persunas d'instrucziun.

² Ils meds finanzials per quests programs vegnan concedids dal cussegl grond en il rom dal preventiv.

Art. 18

¹ Instituziuns ch'èn responsablas per la scola e che dumondan contribuziuns chantunalas per il barat da classas da scola e da persunas d'instrucziun ston drizzar questas dumondas al post da servetsch cumpetent dal departament d'educaziun, cultura e protecziun da l'ambient.

² L'autezza da las contribuziuns per in di da barat importa 90 francs per scolara u per scolar e maximalmain 450 francs per emna.

³ L'autezza da las contribuziuns per il barat d'ina persuna d'instrucziun importa 1 000 francs per emna da scola e maximalmain 10 000 francs per ina perioda da barat.

⁴ Las contribuziuns vegnan concedidas en il rom dals credits disponibels.

Organisaziun da las emnas da barat concernent las linguas chantunalas

Il program d'emnas da barat concernent las linguas chantunalas sto vegnir approvà da l'inspecturat districtual cumpetent. Per ch'ina emna da barat linguistic vegnia reconuschida, ston esser deditgadas almain 20 lecziuns a la lingua che sto vegnir intermediada. Il formular da dumonda correspondent po vegnir chargià giu en questa rubrica.

Las emnas da barat linguisticas pon vegnir organisadas il medem mument (duas classas midan il medem mument il lieu da scola e la regiun linguistica) u en moda spustada (las classas sa visitan vicendaivlamain e lavuran ensemen en il lieu da scola da la regiun linguistica correspondent). Las emnas da barat linguisticas sa restrenschan als territoris geografics dals chantuns Grischun e Tessin.

Persunas d'instrucziun che fan quint da realisar in program da barat tenor ils art. 17 e 18 da l'ordinaziun da linguas contacteschan la manadra u il manader da partiziun da l'inspecturat da scola e da scolina. Questas dumondas vegnan tractadas en moda individuala.

Surpigliada dals custs

Il chantun sustegna las emnas da barat concernent las linguas chantunalas cun 90.– francs per di e per scolar(a), maximalmain cun 450.– francs per emna. Las indicaziuns correspondentas ston vegnir inoltradas da la persuna d'instrucziun a la cassa da l'autorità da scola (download dal formular da rendaquint per las autoritads da scola). Quella fa giu quint cun la partiziun "finanzas" da l'uffizi per la scola populara ed il sport per la fin da l'onn da scola. In formular correspondent per far giu quint vegn tramess da l'uffizi a las vischnancas.